

ЛУИМА СЭРИПОС

14 августа
2015 года
№15
(1105)

www.khanty-yasang.ru

Общественно-политическая газета

E-mail: luima@ugracom.ru

Основана 11 февраля 1989 года



Сосаң мирыт янытлан хоталт О.А. Фомичёва ос С.А. Попова Юван
Шесталов намыл пиным премиял майвесыт.
Ты урыл 12-13 лопсыт ловиньтэн.

Ты
номерт
ЛОВИНЬТЭН:

Йис мāt
ōлнэ мāхум
нĕтавет

3

Ўст ős сāv
тārвитың
вāрмалъ ōлы

5

Āс мāньщи
эква
ōлупсатэ

8-9

Хōнтаң
мāньщи
ōйка урыл

14

Нĕврамыт
Рума нĕр
мус ялсыт

16

Кўшай нэ Ягримт сапрāни вāрыглас

Округ губернатор Наталья Комарова Хāльўс районын ялме порат Ягримт ълнэ мāхум ѓт хѡнтхатыглас. Сапрāнит 60 арыгкем ѓлумхѡлас ѡлыс. Яныг кўшай нѡн тārвитың вāрмаляныл урыл потыртаңке Приполярный, Светлый, Аңъя ос Восыңтўр пāвылныл мāхум ѓхталасыт.

Ягрим пāвылт ѡлнэ хум Дмитрий Чесноков ты сапрāнин ѡс ялыс. Мāнылат хум акв ѓрнэ тѡла урыл Наталья Комарован потыртас. Тав лāвыс, пāвылт акв яныг склад ѡлы. Хосат тāгылта яныг кол тѡла тāl ұнлы, Дмитрий Чесноков

нāврамыт ос мāнылат хѡтпат мāгсыл тот каснэ кол вāруңке таңхи. Тамле кол рўпитаңке ке паты, āгиришит-пыгришит спортыл пўмшалахтуңке тах патѓгыт.

Наталья Комарован ты тѡла сака мўстыс.

Тав ювле лāвыс, ты ѓлы-пāлт ты кол ѓмашакв сунсыглаңке ос уральтаңке ѓри, нāврамыт мāгсылтамле кол вāруңке тот рѡви ман āти. Ты рўпата мāгсыл олн миңке лāвхатас.

Дмитрий Чесноков лāвыс: «Олныл кемивѡв, ам ты вāрмалы хосыт ѓлалы рўпитаңке тах патѓгум. Ягримт ѡлнэ мāнылат хѡтпанув ос нāвраманув вина нупыл ос мѡт лѡль пищ нупыл ул вос сунсѓгыт ос касуңке ты колн вос

ѓхталѓгыт».

Сапрāнит ѡлум мāхум тāнки тārвитың вāрмаляныл урыл Наталья Комарован потыртасыт. Тāн яласан лѓңх урыл, рѓг, вит мāгсыл ойтхатнэ вāрмалит ос сāv мѡт тѡлат урыл китыглахтасыт. Кўшай нѡ ты тārвитың вāрмалит тāра тах паттыанэ.

**Округ кўшай
пресс-службатѓ
кѓтум лāххал
мāныщи лātңыл
Людмила АЛГАДЬЕВА
хансыстѓ**

Хāльўс районт мāхум сākконыт ѡс хансѓгыт

Округ кўшайов Наталья Комарова Хāльўсн ялме порат район дума депутатыт ѓт хѡнтхатыглас. Ты тāl районный дума рўпитанѓтѓ пāsныл 20 тālѓ товлыс.

Округ кўшай нѡ депутат-мāхумн тох лāвыс, Хāльўс район бюджетѓ 3 млрд. солкѡви сāvитыг ѡлы. Сāвыңпālѓ ты олныт округ бюджетныл тāставет. 570 млн. солкѡви сāvит тāн налог-олныл туп атѓгыт. Ос ѓлалы хотмус округ бюджетныл олн ўруңкв ат ѓри, тāнти сѓлым олнытыл вос ѡлѓгыт.

Тувыл депутатыт лāвсыт, Хāльўст товлыңхāпыт ѓл-иснэ мā округ нупыл вос хансаве, таве аква ѓмашакв щѓпитаңке ѓри. Ос олн āтим. Та районт мāн пāвлыт мус туп вертолѓтыл ман товлыңхāпыл минуңкв рѡви, воссыг нѡмхотмус.

Хўл алыщлан рўпата урыл ѡс мощ потыртасыт, ань хўл пувнэ мāгыс квота-нѡпакыт сака лѡльсаң мивет. Тот ѡлнэ мāхум сāvнув хўл пувуңкв вос тārтавет.

**Округ кўшай
пресс-службаныл
тѓтим лāххал
мāныщи лātңыл
В. ХОЗУМОВА хансыстѓ**

Хāльўс район Ягрим пāвылт тав округ кўшай нѡ Наталья Комарова ѓт потыртаңке 250 сāvиткем хѡтпа ѓхталас. Тāн ѓтаныл тав хѡтахкем щѓс потрамас.

Сāвнув хўл пувуңкв тārтаве

Мāхум сāвыңпālѓ ялнэ-миннэ лѓңхыт урыл китыглахтасыт. Ягримт ѡлнэ нѡ Елена Запорожец лāвыс, Приобье причалыл вокзал мус минуңкв тārвитыңыгѓмтыс. Сārтын мāхум сохтыл кѓрлѓңх ұлтта ѓмсыт. Ань лѡль нак ул вос ѓмтыс, та лѓңх лап-пантвес, ұлтта ѓмуңке мāхум ат тārтавет. Хунт-хўргың тāгыл мувлахи ѓмуңке ос сака хоса.

Лѓңхыт вārнэ департамент кўшай вāның хум Константин Масраков лāвыс, кѓрлѓңх ұлтта ўнсах 2017 тāl мус вāраве тах. Ань ос ты накт причал мāныл вокзал мус автобус мāхум тыглетувле тотыглаңке паты. Сāvнув рейс ѓрмыглы ке, тāн ты вāрмалы щѓпитѓгыт.

Ты коныпал кўшай нѡ лāвыс, Нярихуми Лўи пāвылныл Ягрим мус ос сāvнув автобус яласаңке паты. Нярихуми Лўи пāвыл нālми вātат дебяркадер ўнттувес. Мāхум ань колнакт ўнлахѡлым

«Метеор» ўруңке вѓрмѓгыт.

Хāльўс районт мāхум пѓс йис тāгыл хўл алыщлым ос вѡраим ѡлѓгыт. Таимāгыс сāвыңпālѓ хѡтпат хўл алыщлан вāрмалы урыл китыглахтасыт. Наталья Комарова Россия сельский хозяйство министр ѓт ос хўл алыщлан вāрмалы щирыл рўпитан кўшай ѓт потрамас. Тѓн лāвхатсыг, хўл алыщлан мāгыс квота-нѡпакыт тах кѓтѓг. Тыи ос мѡт тārвитың вāрмалит урыл пāвлың мāхманув кўшай ѓт ты потыртасыт.

**Округ кўшай
пресс-службатѓ
кѓтум лāххал
мāныщи лātңыл
Николай МЕРОВ
хансыстѓ**

ЛЯХХАЛЫТ

Йис мāt олнэ мāхум нётает

Ювле хультум этпост сосаң мир округ Дума депутат нэ Надежда Алексеева Ассамблеят сапрāни щёпитāлыс. Тот тāн йис мā ўргалан сākкон урыл потыртасыт. Ты вāрмалъ щирыл мā-вит ўргалан департамент кўщай Евгений Платонов тув ос вōвиньтāлвес. Сосаң мāхманув манхурип нётмилыл вāравет, нāн тав потре элалъ ловиньтāлын.

—Аньюи-ōвылтāлытт пēs йис мāt сāv сосаң мāхум тāнки рўпата вāруңкве патсыт. Округ янытыл 2013-2014-тāлыт

сыс 1 сōтыра 312 хōтпа йис мāt рўпитāгыт. Ань ты мус тот олнэ мāхум пуссын аквѣт 4 сōтыра 375 хōтпа емтыс. Мāхум

йис мāt акваг олāгыт, тот рўпитāгыт, олныл нётает.

Ты тāлт йис мāt рўпитан мāхум мāгыс 21 миллион солкōви ойтвес. Яныгсāt арыгтем хōтпа нётмилыл вāрвēsыт. Ты олнытыл сосаң мāхум моторхāпыл, «Бураныл» ѳвтвēsыт ос мōт эрнэ тēла мāгыс олныл майвēsыт. Ты олныт хумус холтавет, мāн ты вāрмалъ ёмашакв уральтылўв.

Тувыл йис мāt колыт, āмпарыт ўнттын мāгыс олн ос майлэв. Хōтпа хўл алыщлан мātэт манос вōраян мātэт матыр кол ўнттуңкве таңхи ке, мāн тавēн ос нётэв. Маныр ўнттуңкве рōви, эрнэ нэпакт ты урыл хансым олы. Ты хосыт йис мāt вōркол, пувлын кол, āмпар, сўмъях ос сāлы

ōщнэ пўсас ўнттуңкве рōви.

Хотты хōтпа сāлы ѳвтуңкве ке кāсащи, тāн ос нётает. 2013 тāлт хōтхуйплов хōтпа 51 сāлыл ѳвтвēsыт. Ос та пāsныл воссыг з а я в л е н и е - н ē п а к нэмхотыютатхансыглас. Аман мāхум ты урыл нэматыр ат вāгыт, аман мōт матыр рўпата вāруңкве патсыт.

Кўщай хум лāвыс, вōрт олнэ сосаң мāхумн нāйив щёпитан мāгыс олн ойтункве ат эри. Тувыл тāн вōрт матыр ўнттын мāгыс нōр яктуңкве вēрмēгыт. Мōлты тāl тьи мāгыс аквхуйплов миллион солкōви тāстыглавес. Ты хосыт вāt нупыл хўрум хōтпа нётвēsыт.

Николай МЕРОВ



Рўпитан мāt уральтан хум

Ань тāl охса ювле хультыс, ты кастыл Ханты-Мансийск ўст ляххал тотнэ колн рўпитан мāхумн нётмил вāрнэ кўщай Евгений Кривобоков вōвиньтāлвес.

Ань рўпитан мāхум манырсыр нётмил вōвēгыт, маныр вāрмалъ оньщēгыт, мансāвит предприятие уральтавет ос мōт тēлат урыл кўщай хум тот китыглавес.

Нāн тав потре элалъ ловиньтāлын: «Ты тāl хōт этпос сыс 1 сōтыра 973 вāрмалъ щирыл мāхум мāнавныл нётмил вōвсыт. Мōлты тālныл 20 процент сāvит сāvнув хōтпа нётмил вōвуңкве мāн палтув ѳхталасыт. Кāсың тēла мāн янас уральтаслўв. Ты хосыт тāра-патыс, 4 сōтыра 675 тēла щирыл, кўщай хōтпат рўпитан мāхманыл лўкамтасаныл манос лāпаласаныл.

Мāн ѳвлēt предприятие тн предписание-нэпакт кētэв, ты вāрмалит мўсхалыг вос щёпитāлыг. Ётылнув ты тēла щирыл уральтап вāрēв. Та предприятият, хотыют ты вāрмалит мўсхал щирыл ат щёпитасаныл ке, мāн тāнаныл штраф-олныл пиньянўв. Ты тāl охсатэ сыс пуссын аквѣт 62 миллион 609 сōтыра солкōви сāvит штраф-олн атсўв.

Ты пора 243 уральтап сārтын майлам предписание-нэпакт щирыл вāрыгласўв. Яныгсāt хōтпан щēs ос план щирыл уральтахтуңкве ялсўв.



Ос рўпатат кўщайт ань ошмарыңыг емтсыт. Хунь мāн план щирыл уральтап вāруңкве ѳвылтахтэв, тāн предприятианыл лап-пантыяныл. Тувыл та, мāн сākкон щирыл тāн палтаныл щалтуңкве ат вēрмēв, уральтāl та хультāгыт».

Кўщай элалъ лāвыс, тāн ты тāl мāхум заявления-нэпаканыл щирыл 1 сōтыра 482 уральтан вāрмалъ

вāрыгласыт. Округ янытыл акв сōтыра арыгтем предприятие уральтаңкве ялсыт. Ты хосыт рупитан мāхумн тāра олн ат ойтнэ 129 предприятие осн-паттысыт. Тыгылань 124 предприятие юв-пувим рўпата олныт мāхумн пуссын ойтсаныл. Тамле ты ёмас вāрмалъ рўпата уральтан мāхум вāрēгыт.

Николай САВЕЛЬЕВ

КҮЩАИТ РҮПАТАНЫЛ

Пувласпи āгм ошнэ хотпат магыс ляххал

Та этпосныл мән округувт яныг күщайт рупитан махум лаввэсыт – тән пувласпи āгм (рак IV стадия) ошнэ махумн акваг вос нётэгыт. Ань ты вәрмалъ акваг уральтаңкв патаве.

Ты рупата таимāгыс овылтавес, пувласпи āгм (рущ лātһыл «рак» нампa āгм) ошнэ махум эрнэ тәрпил сāt хотал сыс туп ат хоталн майлувэсыт. Ос ўшдлахтын хотал порат тән танти āгманыл эт юн сака саваласыт. Ты тәрпит āгмың хотпан кāсың хотал миңкв эри. Хотпа тәрпи тал те хульты, тав āгмән шар олнэ накыл ат миве. Сāв хотпа ты хосыт тантинāнылхолтсаныл, воссыг вєритаңкв ат вєрмысыт, элаль олнэ

єр ат ошсыт.

Мощ мōлтынув М о с к в а ў с т Г о с у д а р с т в е н н ы й Д у м а т я н ы г с а п р ā н и в ā р ы г л а в е с, т ā н а н ь т ы я н ы г о с т ā р в и т ы ң в ā р м а л ь у р ы л п о т ы р т а с ы т – п у в л а с п и ā г м о ш н э м ā х у м х у м у с н ё т у ң к в э р ё г ы т. К ā с ы ң р е г и о н т ā н х ў л т н э н ё п а к ы л т ё т с а н ы л, м а н ы р р у п а т а т ā н а н ы л н в ā р у ң к в э р и.

Мāн округувт āгмың хотпан нётнэ магыс ань тамлерупата овылтавес: – округув янытыл

22 пўльницат рупитан махум āгмың хотпат ляпа рутаныл хаништаңкв патыяныл, хумус таит тәрпил миңкв эри, нётуңкв ос тыттуңкв хумус эрэгыт.

– āгмың хотпат номтаныл емасыг вос олсыт, психолог-лєккар юв єхталаңкв паты;

– юрист-хотпа эрмыглы те, тән ос юв єхталаңкв патэгыт;

– эрнэ тәрпит манмōт эрнэ пормасыт пуссын юв тотуңкв патавет, ляпарутанылн нэматыр євтуңкв, нэматыр тинсуңкв ат эри;

– āгмың хотпа рутанэ ос нётуңкв патавет, ты нётмил «социальный защита управление» пāлыл вāруңкв патаве.

Ань Россия янытыл

ос округувт «Горячая л и н и я» нампa телефоныг вāрвэсыг. Матыр вāрмалъ те емты манос пувласпи āгм ошнэ хотпа хотмус нётуңкв те эри, тара тув свонитэн.

8-800-500-18-35 – ты Россия «Федеральный служба по надзору в сфере здравоохранения» тав телефонэ;

8-800-100-86-03 – ты телефон мāн округувт рупитаңкв паты, «Медицинский информационно-аналитический центр» тав телефонэ.

Мир пусмалтан департаментныл тєтым ляххал мāныщи лātһыл В. ХОЗУМОВА хансыстэ

Хўлыт ёмщакв пāйтэн, солвалтэн

Ты этпос овыл хоталэт округ лєккар хотпат хўл урыл потыртасыт, маныр āгм тән тотэгыт ос манрыг пусмалтахтуңкве эри. Я хўлыт хосыт описторхоз āгм емты. Кāсэв, щапак, тўрхул ос мōттамле хўлыт палт ты āгм олы.

Тамле хўлыт нярыг, лўльсаң пāйтым ос мощща солвалтым тєпьялан порат хотпа мāйтэт ўит та квāлапегыт. Ёты-оылт ты хосыт тārвитың рак-āгм емтуңкве вєрми.

Ос лўимāt олнэ махум номсэгыт, тāнанылн ты āгм пусмалтаңкве ат эри. Эрттам тавєн нэматыр лўль ат емты. Лєккарыт ослāвэгыт, ты āгм тара ат ке пусмалтаңкв, мāйтыт олнэ ўит сāвмуңкве патэгыт. Ань ты āгм пусмалтан магыс емас тәрпи вāрвэс. Ты тәрпит, хотпа мāйтэ пусмалтан порат, лўль вāрмалъ ат тотэгыт. Махумаквет, нāн ос нāнкинāн емас вāрєн, пўльницан вāтихал уральтахтуңкве ялєн.

Медицина ос профилактика Центрыт рупитан махум кєтум лāтың мāныщи лātһыл Николай МЕРОВ хансыстэ

Нāйпос, рєг ос вит мāгсыл ойтхатнэ урыл

Общественный палата Ханты-Мансийск ўст сапрāни вāрыглас, махум рєг, вит, нāйпос мāгсыл ойтхатнэ вāрмалъ урыл тот потыртасыт. Округув янытыл олнэ махум вāтихал ты тєла урыл пищма Общественный палатан хансыглэгыт. Ты талт тот общественный совет вāрвэс, тув пєриим хотпат ЖКХ тєла хосыт ань акваг рупитаңкв патэгыт.

Махум округ янытыл сапрāнин вōвиньтāлвэсыт. Пāвлытт манос ўсытт манхурип тārвитың вāрмалит олэгыт, та урыл потыртасыт.

Юрий Новицкий, Ханты-Мансийский район общественный советыт рупитан хум, ты урыл ос потыртас. Тав лāвыс, ань та район янытыл олнэ мир рєг, нāйпос, вит мāгсыл лўльсаң ойтхатэгыт. Тыи мāгсыл тōва компаният мўсхалыг рупитаңкве ат вєрмєгыт. Ань щємьят коланыл ємашакв щєпитан мāгсыл олн ойтэгыт. Тōват ты олн ойтуткве шар ат кāсашєгыт. Хоты кол ос хунь ємашакв щєпитаңкве эри,

ос мансāвит олн тув холтаве, общественный советыт рупитан хотпаттыурылакваг потыртэгыт.

Нефтеюганск ўст тамле общественный совет ос рупиты. Ыст олнэ махум пищма тув вāтихал хансыглэгыт. Сāккон щирыл кāсың щємьян такви колэт рєг, нāйпос ос вит мāгсыл ойтхатнэ счєтчик вāруңкве эрыс. Тāн тамле утыт євтсыт, коланылт вāрсыт. Тувыл тāн элаль счєтчик тāl сāв олныл ловиньтавет. Тыщирыл махум урккуптавет.

Мōт ўсыт, пāвлыт ЖКХ махум хумус рупитэгыт ос манхурип тārвитың вāрмалъ тот олы, сапрāнит махум ос потыртасыт.

Людмила ТЕТКИНА

Савалап нъяврамыт щёмьят янмалтавет

Ойттур этпос атхуйпловит хоталэт Ханты-Мансийск үс ляххал тотнэ колн опека ос попечительство округ управленият кұщай вәңын нэ Елена Немчинова ёхталас. Тав округувт савалап колытт өлнэ нъяврамыт уральтым рупиты. Тән мәгсыланыл манырсыр рупата вәраве, тав ты урыл потыртас.

Ты кұщай лавыс, ань ты хотал мус округувт щән-ащ тәл хульгум 7 сөтыра 710 нъяврам олы. Тән халанылт яныгсәт арыгкем нъяврам савалап колт яныгмёгыт. Югра мәт ат савалап кол ань рупиты. Ос мощёртын

Нефтеюганск үст «Светозар» нампә кол лап-пантаве. Ты хотал мус тот туп налыман нупыл ат нъяврам хульгис. Онтоловхуйплов агит-пыгыт ты тәл нёлоловхуйплов тәланыл төвлынэныл

порат тәнки янас олуңкве патёгыт тах.

Та сыс округувт савыңпәлэ савалап нъяврамыт щёмья хонтсыт, тотянмалтавет. Ты вәрмәль щирыл Россия яныгыт Югра мәв хұрмит местат олы. Ань ты хотал мус 98 процент савит савалап нъяврам щёмьяна тыт вуйвёсыт.

Тувыл ос акв ёмас вәрмәль олы. Ань лёлъсаң өлнэ щәнит-ащит мощамаңкве патсыт. 2013 тәлт 511

тамле щән-ащ олыс. 2014 тәлт 428 хөтпа хульгис. Кұщай нэ лавыс, ты щёмьят ёт яныг рупата вәраве. Олупсаныл ёмасыг щёпитан мәгыс тән акваг нётавет. Рупитан мән паттавет, вина ул вос айсыт, акваг уральтым оныщавет. Ётылты щёмьят ёмшакв олуңкве патёгыт ке, тән нъявраманыл ювле миңкве вәрмавет.

Николай МЕРОВ

Үст ос сәв тәрвитың вәрмәль олы

Ханты-Мансийск үс Миркол кұщай Максим Ряшин ляххал тотнэ колн вөвиньтәлвес. Ань округ кұщай нэ Н. Комарова үс кұщайт пуссын өвлэт тәрвитың вәрмәлит мұсхал щирыл щёпитаңкве лавсанэ. Таимәгыс ляххал тотнэ маҳум хум кол ұнттын, тәнүт тыналан вәрмәль ос мөт тәлат урыл китыгласаныл.



М.Ряшин

Ты тәл яңк нәтнэ этпост үс мирколт рупитан маҳум сапрәни вәрыгласыт. Тот тән щар тәрвитың вәрмәлит нәпакн хассаныл. Ты хосытань пуссынаквёт хөтпан савит савсыр вәрмәль щирыл рупата вәраве. Ань кит вәрмәлиг урыл элалъ хансәгум.

Ханты-Мансийск үс щар яныг тәрвит - ты өлнэ кол. Ань ты мус пёс колыттиң сав хөтпа олы. Ты колыт хосат тагыл хот-лөсталаңкве эрөгыт. Ты тәл үст налыман нупыл хөт пёс кол хот-лөсталан мәгыс олн тәстувес. Ань Ханты-Мансийск үст 86 колытт маҳум кұр пәлтыглым өлэгыт, ты 360 щёмья.

Миркол пәлыл ты маҳум мәгыс кәсың тәл мощшал-мощшал кол ёвтаве. Ты вәрмәль щирыл яныг нётмил округ мирколт рупитан маҳум тән вәрөгыт. Ань рупитан програмат щирыл мөлты тәл 950 миллион солкөви майлуves. Ос кұщай хум лавыс, колыт ты кос ёвтэв, ос төва маҳум йильпи колн вәнтлуңкве ат таңхөгыт. Тән яныгнув кол вөвөгыт. Акв хөтпа пёс колт хульты ке, та кол хот-лөсталаңкве ат вәрмаве. Тыимәгыс та элумхөлас ёт осэ-вәтал тасутытахтөгыт. Кұщайт маҳумн ты кос лавөгыт, яныгнув кол ёвтнэ мәгыс тәнки субсидия-

олн лов тәлн вос выгыт. Ты тәла щирыл савсыр програмат рупитөгыт. Ати, маҳум ат торгамтөгыт, тән ойтхаттәл яныг кол виңкве таңхөгыт. Тох та акваг воритотөгыт.

Тувыл ос кұщай хум тыналахтын вәрмәль урыл потыртас. Ань кризис ёмтум хосыт мөт хон мәныл тәнүт тыг ат тотаве. Ос мәнки вәрүм тәнүтанув ләпкат сака тыныңыг ул вос өлсыт, ты вәрмәль кұщайтн акваг уральтаңкве патаве. Ләпкат тәнүтыт тынаныл ман яныгыт нөх-нөтавет, кұщайт маҳум вәтихал китыглыяныл, савсыр сапрәнит вәрыглөгыт.

Ты конь пәл кұщай хөтпат тәнүт тыналан маҳум ёт ос вәшиньтахтөгыт, ты вәрмәлит урыл тән ётаныл ос потыртөгыт. Тыналахтын маҳум олупса тәрвитыт торгамтыяныл, тәнүтыт тынаныл сака яныгыт ат вәрияныл.

Ос акв ёмас вәрмәль урыл потыртас. Мәнь таквс ос яныг таквс кит этпосыгт Ханты-Мансийск үст тәнүт тыналан яныг ярмарка щёпитаве. Округувныл ос элы мәныл тәнүт тыналан хөтпат тәнки вәрнэ тәнүтаныл тыналаңкве тыгёхтөгыт тах. Та порат савсыр ёмас ос атың тәнүт ёвтуңкве рөви. Ты вәрмәль таимәгыс вәрыглаңкве патаве, тәнүт тыналан маҳум тәнки вәрнэ тәнүтаныл сытамыг ул вос тыналасаныл. Тән сәккон щирыл рупитаңкве патөгыт.

Ёмашакв өлән, мән потранув аквписыг ловиньтән.

Николай НИКИТИН

Тыг савнув муй махум вос ёхталы



Ты этпос овылтахан порат Кондинский районт фестиваль вӑрыглавес. Мӑн округут туризм тӑлат щирыл рупитан махум тӑн тот акван-атхатыгласыт.

Ань мӑн ӧлнӑ мӑвн савнув мир вос ёхталы, ты тӑла ӑлалы тотнӑ магыс ӧс ӑмашакв рупитаҥкв ӑри. Мӧт мӑныл муйлуҥкв махум тыг ёхталаҥкв те патӑгыт, тӧнт туризм щирыл рупитан хӧтпат савнув ӧлн сӑлуҥкв патӑгыт. Сӑв йильпи ӱшлахтын мӑ тах щӑпитаве, ӑмас лӑҥхыт тах пинавет.

Ос ты рупата вӑрнӑ магыс округут рупитан хӧтпат хаништанҥкв ӑрегыт. Таимӑгысты тӑн

ань ӧвил фестивальн акван-атыглавӑсыт. Мирпussyн «Леушинка» нампӑ турбазан тотвӑсыт. Ты турбазӑ ушты ӱнттувес, ушты рупитаҥкв ӧвилтахас. Урай ӱсныл тув акв щӑс арыгтем машинал минуҥкв ӑри.

Мӑтӑ сака ӑмас, тот яныгман тарыг йивыт ӑлы тованыл пуссын хот-сӑгровӑсыт, мӑтӑ ӑмашакв сыстамтавес. Ляпат я ӧви, тот сӑв хул ӧлы. Тув ӱшлахтуҥкв ёхталан махум магыс


пуссын щӑпитым ӧлы – ӧлнӑ колыт, пувлын колыт, тӑнӑ кол. Татем ӑмашакв вӑрима, улпыл таимӑгыс махум тот атыглавӑсыт. Тӑн вос сунсӑгыт, хумустурбазат ӱнттуҥкв ӑрегыт, маныр щӑпитаҥкв ӑри.

Ань ты фестиваль кастыл Кондинский район кӑсыҥ пӑвылныл махум тув тотыглавӑсыт, тӑн тӑнти пӑвланыл урыл суссылтап щӑпитӑлыгласыт. Кӑсыҥ пӑвыл (ты Междуреченский, Луговой, Мортка, Половинка, Мулымья, Леуши, Болчары) тӑнки пӑвлыҥ мир ӧлупсаныл урыл тот потыртысыт.

Луговой пӑвылныл ёхталам махум тӑн сака пумыш суссылтап вӑрыгласыт – кӑсыҥ хӧтпа аквхотты мир маснутӑ масыс, та мир лӑтҥылпотыртыс, та мир тӑнутыл муйлыл махум тыттысанӑ. Тӑн мӑныши, руш, хатань, еврей, узбек, таджик, украинӑ мирыт маснутыт масыгласыт. Кӑсыҥаныл потыртыс, ӑргыс манос йиквыс. Хул алышлан, вӧраян вӑрмалит урыл потыртысыт. Тасӑвит щӑрынка акван-атмыт, выставкат суссылтасаныл.

Половинка пӑвлыҥ нӑ хӧтпаг хул йсмит яныг пут-капай пӑйтсӑг, махум хулыл тыттысаныл, исмитыл пинсаныл. Та пӑвылт рупитан музей урыл потыртысыт. Кӑсыҥ пӑвыл урыл пумыш хуҥтуҥкв ӧлыс.

Тувыл пуссын сапрӑнин та вӧввӑсыт. Шар яныг кӱшайг тот Александр Юрьевич Комиссаров ӧлыс, тав природный ресурс округ департаментыт кӱшай вӑныҥ хӧтпаг рупиты. Тав атхатам махумн лӑвыс, мӑн округут ӧлнӑ мир туризм щирыл ӑлалы ӑмашакв



Ю.Г. Костылев





Н.Е. Фединкин (с А.Ю. Комиссаров)

вос рүпитэгыт, тонт
тыт олнэ махум ос
ёмашакв нув тах
олмыгтэгыт.

Тан департамента-
нылт Татьяна Павловна
Меркушина ялпың
мат ұралан хотпаг
рүпиты, руш латңыл
ты мат тох лававет
– особо охраняемые
территории. Тув
ос турист махум
тотыглавет. Мот маңыл
ёхталан хотпатн маңыш
ос ханты мирыг пёс
олупсаныл урыл матыр
ваңкв сака пұмаш,
таймагыс ты тан тув
воратэгыт, тув ялуңкв
сака таңхегыт.

Ты нэ лавыс, туризм
тэлат элаль тотнэ магыс
това сакконыт ёмашакв
хансуңкв эрегыт. Тан
ёмашакв рүпитан урак
ат мыгыт. Ос манти
маханув туризм тэлан
хаништаңкв эрегыт. Ань
това мүй хотпат тыг

ёхталанёныл порат ёмас
колт олуңкв таңхегыт,
маныр эри, пуссын кол
тиврыт вос олы.

Ос акв тамле вәрмалъ
осн-нэглыс – мот маңыл
тыг ёхталаңкв кәсашан
хотпат интернет хосыт
тисхатэгыт. Ос пуссын
турбазат, савсыр мот
ўшлахтын мат тот
хансым ат олэгыт.
Тананыл акв маң
хансуңкв эрегыт, хотпат
тара вос хонтыяныл.

Мот вәрмалъ ос тамле
– туризм щирыл рүпитан
махум сака сав олн
мүй хотпаныл выгыт.
Ос танти ўшлахтан
мананыл ёмашакв ат
щёпитыяныл, эрнэ ут
атим, машина атим.
Тох рүпитаңкв, вайм,
ат рови.

Ты сапрәни олум
порат «Леушинка»
наппа турбаза кұшай
хум Юрий Георгиевич
Костылев сака эсгувес.



Т.П. Меркушина

Соль, ты ўшлахтын
ма тав сака ёмашакв
вәрме. Тав потыртаме
порат тара-патыс, ойка
нэматыр олн кұшайныл
ат вөвыс, такви олнанэ
холтсанэ. Ты урыл тав
тох лавыс:

– Ань ты турбаза олнэ
матэт пёс порат тыт
лесопункт олыс, вөр
тот сәгрувес. Атам тот
кұшайг олыс. Ам тав
ляпатэт акваг олсум.
Яныгмасум, институт
әстласлум. Юв ёхтысум.
Тонт вөр тыт сәгруңкв
пөйтсыт. Ам номтыл
ёхтувёсум, ты ма амти
нупылум хансылум
ос ўшлахтын ма тыт
варегум.

Савсыр кұшайтн
пишмат хансуңкв
патсум, тувыл латың
ёхтыс – та ма 25
тәлн арендан виңкв
вөрмилум ос тыт
ўшлахтын ма ўнттуңкв

рөви. Амти олнанумтыл
тыт колыт ўнттысанум,
матэ сыстамтаслум,
яныг пусас вәрсум. Ань
махум тыг ёхталаңкв
сака кәсашегыт.

Т о в а т а н у м н
лавегыт, наң олныл ул
кұшайтн майвёсын, та
яныг турбаза-капай
ўнттыслын. Ам ювле
лавегум, нәмхотьют
анумн олн ат майлас,
нәмхотьют анумн ат
нётыс. Рүпата пуссын
амти вәрсанум. Тох ты
олэв ос рүпитэв. Хотпа
такви рүпитаңкв те
кәсашы, тавён нэматыр
торас атим, пуссын
вәри.

Тамле ты тав кәркам
ойка. Касың хотпа тох
рүпитаңкв те паты,
тонт, соль, маң округвн
савнув мирёхталалуңкв
патэгыт.

Валентина ХОЗУМОВА



Луговой павыл махум

Ас маныщи Эква олупсатэ

Клавдия Ксенофоновна Шадрина, Ас маныщи Эква, Нягань үст ҕлы. Тав мотантыг хотпан талэ төвлы. Ты туй порат тав Хальүс район Аңгы павылн «Шешкинские чтения» наппа маныщи латын элалэ тотнэ ханищтапн ёхталас.

Ам ты нётнэ Эква ёт тот хонтхатыгласум, тав олупсатэ урыл китыгласум. Нан ань тав потре элалэ ловиньтэлын. «Амолнэм палытыл мань школат ныврамыт ханищтым акваг рүпитасум. Амки Октябрьский район Нярихуми Алы павылт самын патсум. Аңкум Ялпус павылт, ашум ос Пёсал павылт самын патсыг. Рүтанум Комудваныт, Шамашит, Кеватнёлт колтагланыл олсыт. Школан минамум порат өвлёт яныг хәпыл минасум. Тувыл ос катерын талттувесүв, катерыл Октябрьский район Перегрёбный павылн тотвесүв.

Тонт 1963 тал ҕлыс. Нярихумит Алы павылт ам анёквум, ақвум, ягпыганум ёт олсум. Ман пуссын маныщи латңыл потыртасүв. Ханищтахтын ман тотвесүв, Перегрёбный павыл интернатн майвесүв. Тот манав

рущ Эква үрыстэ. Ам тав нупылэ аңкватасум, а-на-на, самаге татем яныг. Ам хотрохтысум (мовиньты). Атанэ вуйканыт, ошца, марум супыл масхатым ҕлыс. Ам тай хорамың маныщи суп ошсум, хорамың нйрал масхатым олсум. Я-та-ты, хот-ахвсалахтуңкве лаввёсум, рущ маснутил мастапавёсум ос рушиг вәруңкве та патвёсум. Та сыс манки халувт маныщи латңыл тох та потыртасүв.

Тонт школат нолевой класс ҕлыс. Ман пуссын тув үнттувесүв. Тал палыт рущ латың ханищтасүв. Ётылнув рущ латың торгамтаңкве патыслүв, ушца ҕвыл классын минасүв. Ты вәрмалё сака ёмщакв номилум. Ляпа рүтанум ёт олсум, илттыг мот хәштәл махум палт тотвёсум. Таимәгыс анумен тот ҕвыл порат ханищтахтуңкве сака тарвитың ҕлыс.

Ханищтахтумувпорат



ман Нина Дмитриевна Захарова рущ Эква сака эруптаслүв. Тав сака ёмас сымың хотпаг ҕлыс. Ань матумыгёмтыс, Тюмень уст ҕлы.

Перегрёбный павылт ман хүрум класс мус ханищтахтасүв. Тувыл ювле Нярихуми Алы павылн минасүв. Тонт ашум атимыгёмтыс, тав йильпи кол үнттуңкве ат алымастэ. Таимәгыс ман ювле павылн ёхтумув порат мот кол ёвтсүв. Тот мань сүмъях ошсүв. Тув вәтум пиланув, атум ләхсанув ос ұлыпа

пәкванув пинтласанүв. Павыл я тапалт сәв лям, тахт пил, сәмыл пил, үйрищ пил яныгмас. Акван-атхатэв, я ултта хәпыл товёв, хотал палыт пил та вәтэв. Ман колтаглул сәвыңпәлэ лям ос үйрищ пил вәтсүв. Аңкум ты пилытныл атың нянь вәрыглас. Ты атың нянь ань ты мус номилум.

Павылт акв карыс Эква ҕлыс. Аквматнакт тав алпыл атахкем щёс поратнөх-квәлыс. Пасан вәрыс, манав пуссын квәлттысанэ. Тәнутыл





тыттысанэ, тувыл Нярън пил ватуңкв та тотвэсум. Нярън мус нилахкем вёрысталаглыл ёмуңкве ёри. Та вёрт ма́нь хара ма́о́лы. Эква тоткуршуп ййв тармыл у́нтыс, ма́нав ляпан вóвыстэ. Тэ́нута́нув нòх-висанэ, тотпурлахтасу́в ос э́лаль та минмыгтасу́в.

Насати, пёс потыр щирыл та ялпың ма́т тулың ойка о́лыс. Тот лю́лом яныг ййв капай щахылнсала́йвес, супыг-толматас. Ма́хум та ма́ ялпыңыг ла́выгласаныл, таима́гыс тот ты пурлахтасу́в.

Са́т тэ́нута́-ломт пинсу́в. Хотью́т щай у́нтгыс, хотью́т канпетка манос вóй-ломт пиныс. Та сыс яныг э́ква таквирот матыр потыртас, тувыл пурлахту́нкв та у́нтсу́в. Ма́н няврамыг о́лсу́в, тувле тэ́лав а́ти, ху́нь ва́глүв, маныр ва́рыс. А́нь ва́глүв, тав То́румн пóйкщас, са́в пил вос ва́тсу́в. Пасан ва́тат у́нлэ́в, э́ква ма́навн

матыр тэ́нута́-ломт маяпи, хот-ща́гтэ́в, та тэ́гув.

Тот мо́щ у́нлахо́лсув, тувыл э́ква ля́галас: «Та, няврамаквет, атхатэ́ва, ос э́лаль ми́нэ́ва». Нярън ёхтысу́в, ва́глын ма́н а́ти, ам тыса́вит мо́рах ат ва́щи́ньтасум. Таса́вит, паттуп нас ва́тэ́н. То́нт ве́тра а́гим о́лыс. Хо́тал сыс совтану́в, па́йпану́в та́глэ́кв та́гынта́птысану́в. Тате́м ты са́в пил о́лыглас.

Шко́лат нилы́т классы́т ху́нь хани́щта́хтасум, о́выл щёс мо́рах ва́туңкве ялсу́в. Ма́хум мо́рахта́тэ́гыт, та́тэ́гыт. Но́мсэ́гум, ма́нсави́т тэ́ңкве ро́ви. Насати, та́н а́ти пил тэ́гыт, порс лу́птаны́л супасы́л хот-ву́япанты́яныл. Ам ос порсы́ң та́гыл то́х та ва́тсум. Тувыл яныг э́кван хани́щта́вэ́сум, та па́сныл пилы́т порс лу́пта та́л ва́тэ́гум.

Ня́риху́ми А́лы па́выл т пе́рма о́лыс. Тот лу́выт, мисы́т о́щвэ́сыт. Ма́хум пуссы́н совхозт ру́питасы́т. Тувыл

ам нилы́т класс тот а́стласум, совхоз ла́ккватотвэс. Са́выңпа́лэ ма́хум Ня́риху́ми Лу́и па́вылн ми́насы́т. Тот йи́льпи интерна́т пу́свес, ма́н о́с пуссы́н ту́в ва́нтлупта́вэсу́в. У́щлахты́н хо́талт аква́г лу́вың су́ныл ю́в яланта́су́в.

Шко́ла а́стламум ю́и-па́лт ам Ната́лья Ни́ко́лае́вна Ги́ндыби́на ё́т, ме́н аква́г па́вылны́л о́лсуме́н, Ха́нты-Ма́нсийский педу́чилища́н э́лаль ха́нища́хту́нкве ми́насме́н. Тот шко́лат ма́нь ня́врамы́т ха́нища́н хо́тпаг 1977 та́лт учили́ще а́стласме́н. Ам Серге́но па́вылн ру́пита́нкве кэ́твэ́сум. Тот ку́щай хо́тпа а́нумн ко́л мис. Тувыл ам а́гмалта́хтасум, санатория́н ялсум. Пусма́лтахты́н ма́ныл ю́вле ё́хтысум, Ше́ркалы па́вылн ру́пита́нкве

кэ́твэ́сум. Тот пионе́р-вожа́тыи́г ру́питасум. Тувыл Ленингра́д у́сн аква́г та́лн квали́фика́ция по́выше́ние инсти́тутн ха́нища́хту́нкве кэ́твэ́сум. Тот ху́льгсум, инсти́тутт ня́врам ха́нища́н хо́тпаг ха́нища́хтасум».

Клавди́я Ксенофо́н-товна инсти́тут а́стламе па́сныл аква́г ма́нь ня́врамы́т ха́нища́н хо́тпаг шко́лат ру́питас. 2009 та́лт пенсия́н ми́нас. Ру́танэ па́лт ва́тихал у́щлахту́нкве яланта́ы. Ка́тыл са́всыр пормасы́т ма́щты́рлы. Ялпы́ң хо́талы о́лыглан порат та́в аква́г ту́в вóвиньта́лаве.

Ты А́с ма́ньщи э́ква са́ка ка́ркем, та́в ё́тэ потрама́нкве а́нумн са́ка му́стыс. Та́в са́в пу́маш поты́рва́г. А́мта́вёно́с са́в ё́мас ла́тың кэ́тэ́гум. Пус ка́т, пус ла́гыл э́лаль о́лэ́н!

Николай МЕРОВ



Нэг-хумыг кол үнттэг

Марина Ивановна Тасманова ойкатэ Сергей Петрович Самбиндалов ёт Хальүс район Няхщамволь павылт олөг. Щёмья субсидиял майвес, ты олныл йильпи кол үнттуңкве овылтахтасыт. Мария Ивановна кол үнттын вәрмале урыл маныщи газета мэгсыл тох потыртас.

– Мён 2007 талт очередин хасхатсумён, ос сossaн махум мэгсыл рүпитан программа палныл олн үруңкве патсумён. Ань очередин хасхатнэ хөтпат танки нэпаканыл Ипотечный агентстван пищмал кётыяныл. Маны павлытт олнэ махумн Хальүсн ялантаңкве воссыг ат эри. Ам савсыр эрнэ нэпакыт акван хунь атсанум, заявление-нэпак хансуңкве Хальүсн ялсум. Төнт акваг тыглетувле ялантым сав олн холтсум.

2013 тал ват саграпнал этпост Хальүсн Ипотечный

агентстваныл пищма ёхтыс. Тотхансым олыс, очередьмөн кос ёхтыс, тувыл ойкамёнтыл кол онышимён, тии мэгсыл моща субсидия-олныл мивемён. Төнт ам заявление-нэпак хассум осты олн виңкве ат патсум. Колмён хосат пёсыг ёмтыс, савсыр нэпакыт акван-атсанум, олнэ колмён пёсыг вос хансаве. Нэпакыт пуссын эрнэширылхунь вәрсанум, ойкамёнтыл сас субсидия-олн мэгсыл хасвесамён.

Молты тал вортур этпост оста пищмал ёхтувесмён, тотхансым олыс, субсидия-



олныл мивемён, олнэ кол ёвтуңкве манос үнттуңкве вөрмимён. Овлёт агиягмён мэгсыл Хулюмсүнт павылт манос яныг үст кол ёвтуңкве тахсумён. Тувыл туп мён ойкамёнтыл субсидия-олныл майвесмён. Ты олныл мот мат олнэ кол ёвтуңкве аттөвлөмөн. Мён сас рүпитымён, тувыл ипотека-олныл ат мивемён, моща олн сёлымён. Тии мэгсыл номсахтуңкве воссыг ат патсумён ос Няхщамволь павылт олнэ кол үнттуңкве патсумён.

Овлёт субсидия-олн акв-лөмтэ майвес. Олныл мён норыт, партыт ос мот эрнэ утыт ёвтсанмён. Ты юи-палт ам смета-нэпак хассум. Хоты мат норыт, партыт ёвтсумён ос манасавит олн тув холтсумён, пуссын тув хассанум ос савсыр чек-нэпакыт тув пинсанум. Ты нэпакыт Ипотечный агентстван кётсанум. Ты юи-палт субсидия-олн китыт лөмтэ та кётвес.

Норыт, партыт ос мот эрнэ утыт яныг үст мёнки ёвтуңкве тахсумён. Номсысмён, колмён мощ тынталнув ёмты, тувыл үсн ялантаңкве олн ос эри. Тии мэгсыл Няхщамволь павылт

рүпитан коммерсант палт ёвтхатсумён.

Ойкамёнтыл хосат тагыл ты олн мэгсыл хасхатсамён. Төнт агиягмён иң маныг олсёг. Төнттай яныг кол капай үнттуңкве кусылasmён. Агиягмён яныгмасёг, ань тай мёнамён яныг кол воссыг ат эри.

Ипотечный агентстват рүпитан хөтпат лавёгыт, йильпи колмён акв тал ос хөт этпост сыс вос астылымён. Ос кол нэпаканэ пуссын мұсхалыг атуңкве ос тан палтыланыл кётуңкв эри. Тох уральтавёв, тастым олн мот тэла нупыл ул вос холтыянемён.

Марина Ивановна кол үнттын матэоснэпаканэ пуссын ёмашакв щёпитасанэ, тамле нэпакыт ат ке онышас, субсидия-олныл ат майвес. Маныщи нэ лавыс, ты нэпакыт вәруңкве Хальүсн вәтихал ялантас, тув ос сав олн холтыс. Ань нэ щәгтым олы, нэпаканэ эрнэ ширыл вәрсанэ, субсидия-олныл майвес, ань йильпи колэ туп астылуңкве эри. Тав лавыс, тастым олныл Няхщамволь павылт йильпи кол үнттуңкве ань төвлөвөг.

Людмила ТЕТКИНА





Каснэ махум янытлан хотал

Ты этпос 8 хоталэ каснэ махум янытлан хоталыг олы. Ты кастыл Ханты-Мансийск үст ялпың хотал вэрыглавес, руш латңыл лаввес – день физкультурника.

Касуңкв хаништахтын нэврамыт, спортсмен-хотпат, нас каснэ хотпат пуссын акван-атхатыгласыт. Тананыл янытлан магыс яныг кұшаит ёхталасыт. Та юи-пэлт махум танти халанылт касуңкв та овылтахтасыт. Ханты ос маңыщи касылыт суссылтавёсыт, хум хотпат танти халанылт пёрщисыт. Маңь нэврамыт велосипедыл миным кассыт. Сака сав мир ёхталас, татем пұмышц хотал олыс.

Валентина ВАСИЛЬЕВА

Тарвитың порат рұпитам хотпа

Няхшамволь павылт хұрум яныгпала хотпа Тимофей Ефимович Канев, Юлия Фёдоровна Рублёва ос Татьяна Ивановна Сагандукова «Труженик тыла» нам оныщёгыт. Павыл клубт рұпитан хотпат хонтлам ос та порат кәркамьг рұпитам махум урыл потрыт акван-атсыт. Юлия Фёдоровна Рублёва яныг эква олупсатэ урыл потрыт ловиньтаңкве тот ос рөви.

Юлия Фёдоровна Рублёва Маңья павылт яныг щёмыят самын патыс. Щәняге-әщәге 14 нэврам ямалтасыг. Та порат павылт лов щёмыя олыс. Тав иң нэврамыг олыс, тувыл ёмашакв номитэ, хумус хаштәл хотпат ёхтысыт

ос павлың мир мисаныл, луваныл, пәляныл ос мот үйхуланыл хот-н я р т у м т а с а н ы л . Щәняге-әщәге ос хұрум лув ос сәлыянэн пуссын колхозн мисанэн.

1941 тәлт тәлы порат тән Усть-Манья павылн тәнүт ёвтуңкве минасыг. Тонт махумн лаввесыг, яныг хонтлын нак овылтахтас. Юлия Фёдоровна кит қаңкаге тәра хонтлаңкве тотвесыг.

Павылт хультум махум пуссын колхозт рұпитаңкве патсыт, пум вәрсыт, пил вәтсыт, хұл алыщласыт, ворясыт. 1946 тәлт Усть-Манья павылт колхоз вәруңкве овылтавес, Маңья павылт олум мир рұпитаңкве пуссын тув вәнтлуптавёсыт. Щәняге-әщәге ос тув рұпитаңкве минасыг. Война оигпам юи-пәлт қаңке Иван ювле ёхтыс, мот қаңке Константин хонтлым порсас.

Юлия Фёдоровна овыл классын Маңья павылт минас. Тувыл элалы хаништахтуңкве Няхшамволь павылн кётвес. Школа әстламе юи-пәлт павылн ювле ёхтыс, колхозт рұпитас.



Хаништахтуңкве тав сака таңхыс, тыи магсыл Ханты-Мансийск үсн минас. Тот нэврам хаништан хотпаг хаништахтас, тувыл Усть-Манья павылт школа кұшаиг рұпитаңкве паттувес. Павыл школа хунь лап-пантвес, тав Кондинский районын кётвес. Пенсиян миаме мус тот рұпитас, 1983 тәлт Няхшамволь павылн олункве ювле ёхтыс.

**Ты потыр маңыщи
латңыл Людмила
ТАСМАНОВА
хансыстэ**



Соссаң мирыт янытлан хотал олыс

Вортур этпос 9 щислат соссаң мирыт янытлан мирхал хотал кастыл Ханты-Мансийск ўст ялпың хотал олыс. Та хоталэт ўскант «Город мастеров» наппа суссылтап рўпитас. Савсыр маңыл ёхталам мащтыр хотпат савсыр пормасыт, сувенирыт тыналасыт.

Соссаң маҳум общинат хўл, пил, лахыс тыналаңкве ёт тотыгласыт. Касың элумхолас хўл, нёвиль ос мот тэнут ёвтуңкве вёрмыс. Няврамыт савсыр пўмаш ёнгилыл вэрыглавёсыт, тэн сáлы сун ўлтта поргысыт, тыныщаң пáхвтысыт ос мот щирыл кассыт. Акв та хоталэт соссаң маҳум янытлан магсыл концерт олыс, эргын ос ййквнэ хотпатокругянытыт ёхталасыт. Ты коньпал Москва ўсныл ос Алтай маңыл мўй маҳум эргуңкве ос ййквуңкве вовиньтáлвёсыт.

Ялпың хотал олум порат «Славим человека

труда» наппа конкурс мащтыр хотпат магсыл вэрыглавес. Мán округвт нóх-патум хўрум хотпат Татьяна Уколова, Александр Сеницын ос Надёжда Павлова ёт касуңкве 12 элумхолас ёхталас. Тán тáнки о́лнэ мáт Ямалт, Свердловский, Курганский, Тюменский ос Челябинский областит ос о́выл места висыт.

Акват сáсныл хусап вáрсыт, мотаныт ййвныл тáй ёргысыт ос хўрум хотпат хўл манос сáлы совныл тучаң юнтсыт. Тán нила щёс рўпитаңкве туп вёрмысыт. Ты пора сýс хотпа рўпататэ вáруңкве



ат ке алымас, ювле та хультыс. Тán онтолов щёс порат рўпитаңкве о́вылтахтасыт ос акв щёс порат пуссын áстысыт. Ты юи-пáлт жури нóх-патум хўрум мащтыр хотпа пёриясыт.

Яныг кущай нэ Наталья Комарова соссаң маҳум ялпың хоталыл мащтыр хотпат янытлаңкве ос ёхталас. Тав тáнанылн сáв сымың лáтың лáвыс.

Ййвныл сáвсыр пормасыт ёргын хотпат халт Юрий Деняев о́выл места вис. Тав Челябинский областиныл ёхталас. Сáсныл савсыр хусапыт вáрнэ хотпат халт ос тав пыге Владимир Деняев нóх-патыс. Ос сáлы маносхўлсовныл савсыр пормасыт юнтум хотпат халт Яков Салиндер,

Ямалт о́лнэ хум, о́выл местал майвес.

Акв та порат Юван Николаевич Шесталов премиял маим хотпат янытлавёсыт. Тамле премиял соссаң мирыт пёс йис вáрмаляныл э́лаль тотнэ маҳум мивет. Ты тáл тамле олныл кит ма́ньщи хотпаг Áс-угорский институтыт рўпитан учёный нэ Светлана Алексеевна Попова ос «Элы хотал» наппа общинат рўпитан кущай нэ Ольга Александровна Фомичёва майвесыг. Тэнатэн янытлаңкве Григорий Ледков, Россия янытыл о́лнэ мощаг хультум мирыт Ассоциацияныл кущай хум, Москва ўсныл ёхталас.

Людмила АЛГАДЬЕВА





Мăштыр хѳтпат халанылт кассыт

Ты тăл губернаторув Наталья Комарова мăн округувт ѳлнэ соссăмăхумпѳс йис вăрмаляныл элаль тотнэ тăлыг намаястэ. Ос тăн мăгсыланыл сăвсыр ялпың хѳталыт, касылыт, ханищтапыт, фестивалит вăрыглаңкве лăвыс. Яңк нăтнэ ѳтпост Президент пăлт рупитан кўщай хум Игорь Холманских ѳт тав акван-хѳнтхатыглас ос ты тѳла урыл потыртас. Тѳнт Наталья Комарова кўщай хумн лăвыс, соссăмăхум пѳс йис наканыл элаль тотнэ мăгсыл «Славим человека труда» нампаконкурсѳсакв номинациял вăруңкве ѳри. Игорь Холманских

хумн ты вăрмалъ сака мўстыс ос мăштыр мăхум халт касыл вăрыглаңкве лăвыс. Тамле касыл 2011 тăлт Свердловский областит вăруңкве ѳвылтавес. Ань Уральский округувт сăвсыр рупата вăрнэ мăхум тăнки халанылт 13 номинация щирыл касѳгыт.

Тѳнт сăлы манос хўл совныл сăвсыр пормас юнтнэ хѳтпат, сасныл сăвсыр хусапыт вăрнэ мăхум ос ййвныл сăвсыр аныщарыт ѳргын хѳтпат хўрум касылыл вăрвѳсыт. Ты юи-пăлт Уральский округув янытыл ѳлнэ мăштыр хѳтпат тăнки ѳлнэ

мăнанылт халанылт касуңкве патсыт.

Мăн округувт мăштыр мăхум тăнки халанылт ѳс кассыт. Округ янытыл 20 ѳлумхѳлас тăнки рупатаныл Ханты-Мансийск ѳсн кѳтыгласаныл. Жюри-хѳтпат тăн халанылт хўрум мăштыр хѳтпат пѳриясыт. Нижневартовский район Аган пăвылыныл ѳлнэ ханты нэ Татьяна Семѳновна Уколова нѳх-патыс. Тав сăсныл совтыт, пăйпыт сăвсыр аныт ос хусапыт вăруңкве сака мăштырыг хăсы. Нягань ѳст ѳлнэ ѳйка Александр Иванович Синицын ййвныл сăвсыр аныт ос мѳт пормасыт якты, тав ѳс овыл местал майвес. Сургут ѳст ѳлнэ нэ Надежда Фѳдоровна Павлова сăлы ос хўл совныл сăвсыр пормасыт юнты, тав ос ѳвыл места вис. Ты хўрум хѳтпат вѳртур ѳтпос 9 щислат мѳт мăштыр махум ѳт касуңкве Ханты-Мансийск ѳсн вѳвиньтăлвѳсыт.

Мăнщиянув тăнки рупатаныл ты касылн ѳс кѳтыгласаныл. Сургут ѳст ѳлнэ хум Александр Дмитриевич Сайнахов ййвныл ѳргим пормасанэ тув майлысанэ. Тав туп хўрмит местал майвес, тыи мăгсыл элаль касуңкве ат вѳввес. ѳвлѳт лăввес, ты конкурсыт туп соссăмăхум касуңкве патѳгыт.

Мăн округувт ѳлнэ мăнщит, хантыт мăштырлаңкве пуссын хăсѳгыт. Тувыл сăвсыр мѳт мăхум тот касуңкве тув вѳратасыт ос кит номинацият рущ хѳтпаг нѳх-патсыт. Ты щирыл соссăмăхманув пѳхыт та хулытсыт.

Людмила ТЕТКИНА



Хонтаң маныщи ойка урыл

Кондинский районт маныщит, хантыт, ёрныт, рушит, хатанит ос савсыр мот мирыт олэгыт. Маныщит пёс йис порат тув олмыгтасыт. Ань тот туп Шугурт павылт савнув маныщи хотпа олы.

Максим Семёнович Шивторов та павылт сака янытлаве. Тав тот олнэ маныщит пёс йис вәрмаляныл ваганэ ос щань латңыл потырты. Учёныит хунь тув ёхталэгыт, тән пуссын тав колн щалтсэгыт.

Ты маныщи ойка 1939 талт яныг таквс этпост Левдым павылт самын патыс. Тот школат хаништахтас. Тувыл школа лап-пантвес ос нилыт классныл сатыт класс мус Карымкары школа-интернатыт хаништахтас. Шаняге-ащаге сас маныщииг олсыг. Аятэ Шивторов Семён Иванович колхоз кұцаиг рупитас. Омаэ Шивторова Александра Григорьевна ос колхоз мисытпоснэнэгрүпитас.

Максим Семёнович



С а л е х а р д с к и й культпросвет училище асламе юи-палт тара колхозн рүпитаңкве патхатас. Та поратэурыл Максим Семёнович тох лавыс: «Мён курсыт туп кит пыг олсумён, тувыл пуссын агит. Мот пыг Кульпасныл олыс». Тувыл элаль тав лавыс: «Армияныл ёхтумум юи-палт Донбасс мән минуңкве ёмталасум, шахтатрүпитаңкве. Тонт иң манылатыг олсум, сака ат номсахтасум, хащтал мот мот рүпата әрталаңкве тахсум. Тув ат минасум, тыт хультсум. Эквamenteл нёлолов нйврам янмалтасмён».

Маныщи ойка китыгласлум: «Манах апыг-н я в р а м о н ь щ е г ы н ? » Тән экватэныл куньгим ювле лавсыг: «Ань тай аты ловиньтымён, манасавит апыг ос апыг-нйврам оныщимён».

М а к с и м Семёнович Галина М и х а й л о в н а э к в а т э н т ы л нилахуйплов апыг оныщег. Товат иң

школат хаништахтэгыт, товат институт мощёрт аслтэгыт. Шар яныг апгён Тюмень уст олы, лёккарыг рүпиты. Тав омаэ хольт лёккарыг хаништахтас. Омаэ нйврам пусмалтан лёккарыг рүпиты. Акв агитэн Шугур школа кұцаиг рупиты, наме Лариса Максимовна Шивторова.

Экватэ Галина Михайловна Ялуторовский районныл олы, тав саран. Эква 1936 талт Ивановка павылт самын патыс. Ш у г у р п а в ы л н мүйлуңкве нас ёхталас, Максим Семёнович ёт хонтхатсыг, акван-минасыг. 1990 талт Кондинский районт олнэ маныщит Максим Семёнович «Северный фонд» кұцаиг пёрийлсаныл. Ойка ты урыл тох потыртас: «Фонд павлың махумн кол унттуңкве нётыс, кол унттын магыс ёрнэ ут ёвтсүв. Туп акв вәрмаль нупыл номтум атпатыс, манрыг махум национальностьирыл уртуңкве патвёсыт. Тонт сав махум нётмил винэ магыс маныщит

хасхатасыт».

Маныщи ойка щань латңе урыл тох потыртас: «Мән Кондинский районт товёрт мот павылныл ёхтум махум ёт потыртамув порат халувт ат торгамтахтасүв. Левдым павылныл Шугурн маныщит ёхталасыт, потырым това латңаныл ат торгамтасаныл. Тамле ты маныщит савсырыт потраныл олсыт.»

Ань ойка лавыс: «Пёс махманув щань латңыл потыртаңкве ат тартвёсыт. Яныг махум номсысыт, нйвраманыл маныщи латңыл ат ке потыртэгыт, руц латың ёмашакв ваңкв патэгыт. Тыи магыс ань хонтаң маныщит ты латың ат вагыт».

Экваг-ойкаг яныг колт тэнккетән олэг. Тэнатән маршум ати, нйвраманән, ляпа рутанэнаквагёхталэгыт.

«Кол рүпата мёнки вәримён. Тув палытыл унттым тэнутамен мёнки сунсымен. Порс пум маныгтаңкве, пилыт ләкквә-унттуңкве, картопка порсаныл хот-маныгтаңкве, пуссын мёнки вәримён. Ты рүпата вәруңкв астетгум ос Юконда ян няслуңкве ялантәлэгум, тәнэ магыс хул пувегум. Тыщирыл ты олымён.»

Максим Семёнович ос Галина Михайловна 56 тал аквёет олэг. Сав ёмас латың тэнатән лавуңкве таңхегум - сөт, щунь, хоса нот пустагыл олункве.

**Наталья Ткачук
потре маныщи латңыг
М.Т. ДВИНЯНИНОВА
толмашластэ**



Хөнтлаңкве ялум каңкыг



Мән редакциявн Мария Тихоновна Двинянинова пицма кётыс, тав Победа хөтал 70 тәлэ төвлум кастыл такви атятэ Тихон Иванович Номин ос тав апицитэ Илья Иванович Номин урыл потыр хансыс.

– Ам атям Тихон Иванович Номин Хаңылсам павылныл олыс. Потре щирыл тав 1916 тәлт самын патыс. Метрикатэ ат вәслум, таи магсыл ат вәглум. Ты павыл Хальүс район Хулюмсүнт пөхат олыс. Атям ишколат ат хаништахтас, тувыл руш ләтңыл ёмашакве потыртас, таи магсыл военный билетыт хансым олыс – овыл класс тав аслам. Хөнтлан нак элы-пәлт ос та юи-пәлт хул алышлан ос

вөраян хөтпаг олыс. Төва тәлыт ос туи порат экспедициянтув палытн ялантас.

Тав Ленинград үс вуантым хөнтлас. Таи магсыл, улпыл, акваг тамле эрыг эргыс: «Кто в Ленинград пробирался болотами, горло сжимая врагу...». Тувыл «Катюша» ос сав мот эргыт эргүнкве сака эруптас. Ты коньпал сав маныщи эрыг вәс. Хөнтлын мәт лаглаге-кәтаге сакватавесыг ос контузитавет, тьи магсыл элалы хөнтлаңкве ат минас, ювле өлнә мән кетвес.

Мән яныгмамув порат хөнтлам нак урыл сака ат китыгласлүв. Тав савсыр справкат онышас, туп ты хөтал мус ты нэпаканэ ат хулытсыт. Төнт мән тувле нупыл тэлав атим олыс. Ань ты вәрмалы урыл пүмшалахтуңкве уш патсүв, тувыл китыглахтуңкве, хөтпа атим. Атям 1991 тәлт вөртур этпост атимыг ёмтыс. Хөнтлан төрыг пөсыт

онышас манос ати, ат вәглум. Победа хөтал юбилейный пөсыт тай сав онышас ос грамотал 9 май кастыл акваг кётыглавет.

Атям апицитэ Илья Иванович Номин ос хөнтлаңкве ялыс. Тав ос 1925 тәлт Хаңылсам павылт самын патыс. Тав 18 тәлэ төвлум порат тәра хөнтлаңкве вуйвет. Хөнтлым Берлин үс мус ялыс. Тувыл туп 1947 тәлт юв ёхтыс. Война оигпам юи-пәлт тав кит тәлт тот рүпитас. Ювле ёхтыс, Кульпас павылт олмыгтас. Пенсиятэ мус речфлотыт бакенщикыг рүпитас.

Тав урөтыл торың ат вәглум. Ты вәнәкем потранум агитэнтыл хулыгласанум. Хөнтламе магсыл сака сав пөсыт онышас. Тав 1991 тәлт тэлы порат тәлт котиль этпост атимыг ёмтыс.



**Мария
ДВИНЯНИНОВА**

НЯВРАМЫТ МӐГЫС

Няврамыт Рума нёр мус ялсыт



Ойттур этпос 12 хөталныл 21 хөталэ мус «Мӑнь ўскве» ўщлахтын мӑт «Горная» намба смена рўпитас. Юлия Боженко, Хулумсўнт пӑвылт ѓлнэ ѓги, тув ѓс ялыс. Няврамыт хумус ўщлахтасыт, та урыл тав мӑньщи газетан потыр хансыс.

– Ты тӑл «Горная» намба смена рўпитам порат Любовь Павловна Стаканова, «Мӑнь ўскве» кўщай нэ, Иван Николаевич Вокуев, яныг хум хөтпа, ос Иван Павлович Рокин, МЧС рўпитан хум, няврамыт ѓт Нёрн ялсыт. Пуссын аквѓет 32 элумхѓлас ѓлыс.

Овыл хөталт мӑн Саранпӑвылт пуссын акван-атхатсўв. Ѓлпыл нѓлолов щѓс

порат машинал Нёрн нупыл минмыгтасўв. Ювле миннэ лѓнхыт катамаран-хӑпыт ос тѓнутанув хультуптасанўв. Ос элаль онтолов верыста «Парнук» намба ўщлахтын база мус ѓмсўв. Мӓтыт хөталѓт ӓлпыл нӓх-квӓлсўв, тӓра Рума нёр нупыл минасўв. Мӑн пормасыт тӑл кос ѓмсўв, тувыл тот сӑв тўйт патыс, тьи мӑгсыл сака тӓрвитың ѓмуңкв



ѓлыс. Рума нёрн хунь ѓхтысўв, ўщлахтасўв, пӓслахтасўв. Хөтал пӑлыт ѓмилав сака вӑгтӑл патсўв, туп йтипӑлаг ѓл-вӑглысўв ос «Парнук» намба ўщлахтын мӑн ювле ѓхтысўв. Ам ѓвыл щѓс Нёрн ялсум, сака пўмаш ѓлыс, хунь акв хөтал сыс тўйс, раквыс, хөтал постыс ос вӓт вӓтыс.

Китхөтал ўщлахтасўв, Регули нёр нупыл минмыгтасўв. Регули нёр мус хунь ѓхтысўв, тот ос та пӓслахтасўв. Та Нёрт ѓс сӑв тўйт ѓлыс, маткем нёр ѓлы-пӑлн тахсўв. Мӑ-витѓ тот

щар мӓт хурипаг ѓлы, Нѓранув такем нѓтнѓг сусхатѓгыт. Аном сака пўмаш ѓлыс, ам ѓйттур ѓтпост тасавит тўйт щар ат вӑщиньтасум. Регули нёрныл вӑглысўв, Ясунт пӑвыл нупыл минуңкве щѓпитахтункве патсўв. Тувыл кит хөтал катамараныл Мӑньх хосыт Ясунт мус нӑтыгтасўв. Аномн Нёрн ялуңкве сака мўстыс. Мӓтыт тӑлт ѓс тах тув ялуңкве таңхѓгум.

Юлия Боженко
кѓтум потре мӑньщи
лӑтнўл Людмила
ТАСМАНОВА
хансыстѓ

Лўимӑ сѓрипос

(Северная заря)
№15 (1105), 14.08.2015

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467)33-36-82

И.о. заместителя главного
редактора – **Узель В.В.**
Телефон (3467) 33-23-09

Редактор
Теткина Л.И.
Телефон (3467)33-22-72

Адрес редакции и издателя:

628011, г.Ханты-Мансийск,
ул.Комсомольская, 31
тел./факс (3467)33-17-52
E-mail: luima@ugracom.ru
Газета размещена на сайте
www.khanty-yasang.ru

Отпечатано:

ОАО «Тюменский дом
печати» г. Тюмень,
ул. Осипенко, д. 81-220

Подписано в печать:

по графику 12.08.2015 г.
в 15.00.; фактически
12.08.2015 г. в 15.00.
Индексы **04399, 54399**
Тираж **1750 экз.**
Заказ **1279**
Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.